

Mithridatico bello, intraturus Posidonii, sapientiae professione clari, domum, fores percuti de more a lictore vetuit, et fasces lictorios januae submitis, cui se Oriens Occidensque submiterat.

Nunquamne legisti, Gaditanum quendam, Titi Livii nomine glariaque commotum, ad visendum eum ab ultimo terrarum orbe venisse, statimque, ut viderat, abiisse?

2. Alexander Magnus Pindari vatis familiae, penetibusque jussit parci, quum Thebas caperet.—Inter spolia Darii, Persarum regis, unguentorum scrinio capto, quod erat auro, gemmisque et margaritis pretiosum, varios ejus usus amicis demonstrantibus, quando taedebat unguenti bellatorem et militia sordidum: *immo hercule*, inquit, *librorum Homeri custodiae detur*: ut pretiosissimum hamani animi opus quam maxime diviti opere servaretur. — Praedicabat, hunc poëtam complexum esse omnia bellandi ac regnandi praecepta; eumque tanto amore atque honore prosecutus est, ut Homeri amator cognominaretur. Interrogante aliquando Philippo patre, cur tantopere hoc uno poëta delectaretur, caeteros vero negligeret? *Ideo*, inquit, *pater, quod non quaevis poësis regem decere mihi videtur, sicut nec quodvis vestimentum. Unius Homeri ingenua est, et magnifica, et vere regia.* — Itaque Homeri libros secum inter bella ferre solitus erat, et quum quiesceret, eos una cum pugione sub pulvino, cui incumbibat, reponere: *militiae viaticum et bellicae virtutis institutionem* appellans. Quum quidam prospere gestae rei nuntius citato cursu accederet, vultu ingentem laetitiam praefrens: *Quod mihi nuntiaturus es*, inquit, *tanto gaudio dignum? nisi forsitan Homerus revixit.*

3. Alcibiades quoque Homerum magno in pretio habuit. Itaque quum forte in scholam puerorum venisset,

Plin. 2. ep. 3. — Aelian. V. H. 13. 7. Plin. H. N. 7. 29. — Dion. Chrys. or. 2. — Plut. in Alex. p. 668. T. 1. — Idem de prof. virt. p. 85. T. 2. — Aelian. V. H. 13. 38. Plut. Alcib. p. 149. T. 1.